

# Powšitkowne WOZJEWJENJA

njedźelu, 29. septembra 2024

## Nyšpor z požohnowanjom konjacych zapřahow

Towarstwo Cyrila a Metoda z.t. přeprašuje wšitkich wěriwych tež lětsa na wosebity nyšpor domchowanki z požohnowanjom konjacych zapřahow. Tón budže tutu njedźelu, 29. septembra, w 14.00 hodź. na łuce při Hatkach w Chrósćicach.

## Běh wo pokal zbóžneho Alojsa

Towarstwo Cyrila a Metoda z.t. (TCM), Sportowa jednotka 1922 Radwor kaž tež tamniši młodžinski klub přeprašuja sportowcow wšěch starobnych skupin wot šěsć lět na běh wo pokal zbóžneho Alojsa do Radworja. Jón přewjedu štwórtk, 3. oktobra. Započatk za wšitkich běharjow je w 9.00 hodź. na sportnišću. Woni móža mjez scěhowacymi čarami wolić: 500, 1.000, 1.500, 2.000, 4.000 a 6.000 metrow. Zajimcy měli so online přizjewić. Link je pod [www.posol.de](http://www.posol.de) podaty.

## Modlenje rózowca w Róžeńće

Na modlenje swjateho rózowca a před Najswjećišim su wěriwi sobotu, 5. oktobra, we 18.00 hodź. do Róžeńčanskeje hnadowneje cyrkwje přeprašeni. Pačerje budu serbsce a němsce spěwane.

## TCM chce woporam powodženja w Pólskej pomhać

Dwě wosadže w Pólskej, kotrejž stej wot powodženja jara sylnje potrjechenej, chce Towarstwo Cyrila a Metoda z.t. (TCM) ze swojej akciju „Łužica pomha“ podpěrać. Kontakt k nim nawjaza wone přez swojeho kruteho partnera w susodnym kraju, prelata dr. Dariusza Kruczyńskeho. Wón ma jako direktor Carity w Ełku zwisk k direktoram druhich biskopstwow a je tak zhonił, kak móhli we wosadomaj Ustroń Śląski a Głuchołazy najlěpje pomhać. Trjebaja tam předewšěm elektriske nastroje, kotrež buchu dospołnje zničene, na přikład chlódžaki a płokawy. Wón na to skedźbnja, zo su předewšěm seniorojo wot podpěry wotwisni. Štóž chcył wot powodženja domapytanu ludnosć podpěrać, njech přepokaza pjenjezy na konto TCM: Cyrill-Methodius-Verein e.V., IBAN: DE 65 7509 0300 0008 2823 66, hesło: „wulka woda“. Štóž sej darowansku kwitowanku přeje, měł swoju adresu podać, pak telefonisce pod čisłom (0 35 91) 55 02 10 pak z mejlku na [TCM@Posol.de](mailto:TCM@Posol.de).

## Nazymska akcija „Łužica pomha“

Towarstwo Cyrila a Metoda z.t. (TCM) chce tež lětsa ze swojej nazymskej akciju „Łužica pomha“ diecezanskemu zwjazkej Carity w pólskim Ełku zaso pomhać. Tam wjesela so nade wšěm, štož w swójbje trjebaš, kaž su to drasta, črije, artikle hygieny a kosmetika za žony a dźěći, ale tež płokanski próšk, kuchinske graty abo pampersy za dźěći runje tak kaž za dorosćenych. Wotedać hodža so dary pjatk a sobotu, 8. a 9. nowembra, kaž tež pjatk a sobotu, 15. a 16. nowembra. Dokładnišo so to sčasom wozjewi.

## **Sponsoring a fundraising**

Norman Reitner z Drježdžanskeho biskopskeho ordinariata poskičuje na próstwu Towarstwa Cyrila a Metoda z.t. (TCM) kurs k tomu, kak móžeš projekty derje planować a k tomu pjenjezy na wšelakore wašnje požadać. Dalekubłanje na polu sponsoring a fundraising wotměje so sobotu, 9. nowembra, wot 9.00 do 16.00 hodź. na „Radlubinje“ w Ralbicach. Wobdźělic smědža so maksimalnje 30 wosobow. By-li zajim wjetši był, by so TCM wo dalše zarjadowanje prócowalo. Jědź a napoje budu přihotowane. Zajimcy – nimo člonow TCM su tež dalši přeprašeni – měli so online přizjewić. Link na to je pod [www.posol.de](http://www.posol.de) podaty.

## **Swjedženska Boža mša z wozrodženjom Bratstwa swjateho różowca w Radworju**

Wěriwi ze wšitkich serbskich wosadow su přeprašene njedźelu, 6. oktobra, składnostnje różowcoweje njedzele do Radworja přińć. Dwurěčna swjedženska Boža mša, na kotraž chcedža Radworske Bratstwo swjateho różowca wozrodzić, zahaji so w 9.30 hodź. Swjedženski předar budže tachant Drježdžanskeho kapitla swjateho Pětra Andreas Kutschke. Swjedženski nyšpor a procesion z postawu swjateje Marije budže w 14.00 hodź. Wěriwi, kiž chcedža do Radworskeho Bratstwa swjateho różowca zastupić, měli formular wupjelnić a na farje wotedać. Link k tomu nańdu pod [www.posol.de](http://www.posol.de) kaž tež pod [www.pfarrei-radibor.de](http://www.pfarrei-radibor.de).